



Komunikadu Imprensa
Tribunál Judisiál Primeira Instánsia Baukau
22 Novembru 2024

Tribunál deskobre kazu violénsia doméstika rezolve iha nível suku:

**JSMP husu autoridade competente atu halo diseminasaun
informasaun ba kazu violénsia doméstika liga ho prosesu justisa formál**

Iha 13 Novembru 2024, JSMP halo monitorizasaun julgamentu produsaun ba prova iha Tribunál Judisiál Primeira Instánsia Baukau kona-ba krime maus-tratus ba kónjuje ne'ebé envolve arguidu AP hasoru nia feen, iha Munisípiu Lautein.

Durante julgamentu produsaun ba prova, tribunál halo leitura ba akuzasaun prokuradór nian katak antes ne'e iha fulan Agostu 2020, arguidu halo agresaun hamutuk dala rua hasoru ofendida, maibé bainhira ofendida ba hato'o keixa iha autoridade lokál, autoridade lokál rezolve no taka tiha kazu refere, nune'e prosesu ba kazu ne'e la to'o iha tribunál.

Tuir loloos autoridade sira hatene katak kazu ne'e autoridade lokal laiha kompetensia atu hakotu iha nível aldeia ka suku tanba violénsia doméstika nu'udar krime públiku. Maske la taka dalan ba autoridade lokál sira atu promove rezolusaun konflitu entre arguidu ho ofendida hodi prevene kontinuasaun krime, maibé ninia prosesu formál tenke continua lori ba prosesu justisa formál.

Tuir Lei No. 9/2016 8 Jullu, kona-ba Lei Suku nian, iha artigu 6 letra (i) defini katak kompetensia autoridade suku ka xefe suku nian inklui promove atividade sensibilizasaun no mobilizasaun ba membru comunidade sira atu halakon violénsia doméstika iha comunidade. Dalan propriu atu kombate violénsia doméstika mak lori autór sira ba hatan iha sistema justisa fomál nia oin nune'e bele eduka arguidu no comunidade katak violénsia doméstika ne'e nu'udar krime públiku.

“JSMP husu ba entidade relevante sira liuliu Ministériu Justisa no Sekretária Estadu Igualdade (SEI) tenke continua organiza socializasaun no diseminasaun informasaun kona-ba Lei Kontra Violénsia Doméstika no sistema justisa formal iha nível aldeia atu fasilita koñesementu adekuada ba autoridade lokál sira la hakat liu sira nia limete kompetensia ne'ebé lei atribui ba sira”, dehan Sr. Casimiro dos Santos, Diretór Ezekutivu Interinu JSMP.

Kazu ne'e rejista iha tribunál ho Nú. Prosesu: 0013/20. LALRO. Julgamentu ba kazu ne'e prezide hosi juis kolektivu Dra. Sribuana da Costa no Dra. Albertina da C. Neves, Dra. Maria Modesta de Almeida Vieira. Entretantu Prokuradór representa hosi Dr. Bartolomeu de Araújo no arguidu hetan defeza hosi Dr. Sidónio Maria Sarmento hosi Defensória Públiku.

Atu hetan informasaun kompletu favor kontaktu:

Casimiro dos Santos

Diretór Ezekutivu Interinu JSMP

Diresaun e-mail: casimiro@jsmp.tl

Telefone: (+670) 33238883/77257466

Website: <https://jsmp.tl>

info@jsmp.tl